

吳文節公遺集

吳文節公遺集卷六十四目錄

尺牘

致周芝生觀察

致劉孟瞻明經

致徐鏡溪司馬

復劉鏡河太守

致林少穆制軍

致王曉林中丞

復蔣子瀟孝廉

致朱丹木觀察

復李石梧制軍

吳文節公遺集卷六十四

男養原謹編

尺牘

致周芝生觀察

專啟者宿松縣拏獲劇賊鄧秀山等一案前因賊犯供有彭澤縣差役陳么牙爲同夥經宿邑移會彭邑拘提解審嗣經彭邑查陳么牙並非縣役係宿松人捕魚爲生卽係購作眼線破獲此案之人將實情移知宿邑一面將陳么牙僉差解往不意陳么牙中途脫逃經曉林中丞檄飭彭邑嚴拘並咨會弟處飭拏卽經弟嚴檄限

拏並將署縣張令撤回另委黃令接署茲據黃令稟稱
已於七月初八日將陳么牙拘案據供伊並非賊係鄧
秀山讎口妄攀其中途脫逃亦係聞宿邑原差有到宿
必送性命之言害怕逃回等語俱係一面之詞殊難憑
信況此等漁人亦難保必爲善類或係先黨賊而後賣
友亦未可定當堂環質自可水落石出但陳么牙是眼
線而非縣差賊供誣捏已屬顯然且能使地方積猾破
獲陳么牙實爲此案有功之人其脫逃亦似係畏累而
非畏罪縱使從前亦非正人功過尙須衡量若快讎口
而洩賊忿將來必至無人敢作眼線於兩省沿江地方

殊有關係鄙見如斯未諗親家以爲然否此案尊處想未提省弟處本應飭縣將陳么牙解歸宿邑審辦而弟現在竟飭司委員將陳么牙解赴皖省聽候審辦者何也一則恐由彭解宿中經本籍或再有疏虞也一則前番有宿邑兵役得規之說係出自陳么牙之口該役等有則恨之無亦生嗔或致有私拷逼供之處亦未可定自不如省訊之較得實而可靠也此又弟鯁鯁之愚慮而冒昧解省之由也用敢奪之親家至可否提省仍應聽候曉林中丞暨親家酌陳非弟之所敢越俎代定也再彭差駱福汪榮現仍飭縣嚴拘勿任鬆勁也

致劉孟瞻明經

大著珍篋衍者數載矣南北忽遽未遑校刊今夏稍閒始得檢付梓人承示令作序言尊著援據之博治剖析之精覈阮黃兩序盡之奚取僕言竊以南北高北下自是河與淮獨行入海以前事自河南徙而奪淮而藉淮以刷黃變遷淤墊之故厯數十年於茲頃歲漕運用灌塘法河與淮不相見河獨入海淮則入江以入海又情事之稍異矣地有定而水無常今之黃淮分流之不同於昔猶之昔之南高北下之不同於今有事者得悉其本末不狃於目見乃可以通其變而宜之然則是書之裨

益後人者豈徒興地之學已哉欽味悅服不盡區區儻
先生未斥其說或卽以此書附刊冊末用當跋尾誌傾
向之私而已序固未敢僭作也嚴寒伏惟爲道自重不
宣

致徐鏡溪司馬

十年睽隔迹遠心親回憶同譜交游天各一方時深悵
結而如足下之金精玉粹弟夙所心折而師事者尤不
禁每一念及輒神馳左右也前者吾兄乞外小試本非
其志也嗣適逢河伯之虐致風帆小阻在朗懷直適然
視之耳側聞昨歲已高舉還山逍遙物外何見之卓而

計之勇也比想讀書味道著述自娛山水近遊欣然命
駕爲東南人物之望成千秋不朽之業欽仰健羨曷罄
蓬棕大集已有刊成者否新著更得幾許能見教一二
否弟承乏封疆力綿任重揀過不遑特以精力未衰未
敢負

恩逸退待罪而已知愛如吾兄其何以誨之耶手箋肅
訊起居伏惟爲道自珍不盡縷縷

復劉鏡河太守

吾弟突遭此事實爲无妄之災其本末原委僕隨處詢
訪已悉其詳同人皆爲吾弟忿惜僕獨爲吾弟幸何也

凡人必經一番挫折始增一分智識卽如吾弟之爲人
僕知之信之深矣而事前卽有謂吾弟自膺首篆頗爲
得意高興者更有謂吾弟汰侈已甚者僕知吾弟必不
至此而所以得此於人者毋亦吾弟年少才盛又爲上
游所倚重羨者忌者環伺其隙稍稍不自斂抑均足以
資口實均足以生事端亦盈虛之理然也此案已結過
吾弟之官如故上游之倚重如故且不必言卽以吾弟
負此才具據理以推將來何可限量區區小頓挫殊不
足介意也僕所以爲吾弟進一解者惟期此後事事於
斂抑之中更求斂抑已知已能者必視若未知未能卽

起居服食之間時時存苟完苟美之見力事斂抑力求
闇淡必有無限受用處也此皆僕無稽之慙言耳苟非
僕與吾弟情同骨肉必不敢以此言進苟非吾弟爲能
受慙言之人亦不敢以此言進惟吾弟鑒其忱而垂察
之幸甚幸甚

致林少穆制軍

昨悉

賜環

恩命旋聞秉鉞

綸音欣感忭愉莫能言喻老前輩公忠盡勸荷

聖明之知眷者甚深而引領公望中外同聲走卒兒童
皆有待澤司馬之意雖老前輩湛然虛靜豈復致念升
沈惟

聖人特以民之視聽爲視聽老前輩得不以眾之欣戚
爲欣戚耶慶頌私忱實與眾同其鼓舞耳年來經理屯
政周厯各城功名所被施及遐邇儼亦冥冥中使增此
一段奇勲也體中想益康佳瀛眷已接至蘭州否聞鏡
帆先返西安近當已趨侍也爲念

致王曉林中丞

前奉紫毫手翰並大疏藁二件盥誦數四無任欽服此

時銀錢並用既多窒礙難行而坐視不救勢將伊于胡底舍大錢一法更無別法鄙意向以爲然讀大著各條細入無間其扼要在錢值與銅價相埒自無私銷之患而一切賦稅皆許兼納自可逐漸流通要知鑄大錢看似益錢其實乃益銀蓋可以輕錢之齎卽所以濟銀之窮雖目前未必卽有大效而由此轉關其功用正無涯也正未知

廷議若何至用金代銀尊意不過帶筆閫中卻切實發揮看來金價必與銀價相較恐滯而多窒且未能多多益善卽姑作罷論亦無不可也大錢之妙妙在但與現

泰山之於邱垤而足下則徵君之繼也竊援其義儻不
至以不腆吐棄否主臣

致朱丹木觀察

馬令昨早已動身大約今日可到矣夜來四鼓後展轉
不能成寐細思周詳彩等盤踞公局卽有死黨百人再
雇倩無聊數百人何以能使通縣人皆不敢上官米必
先赴伊局繳錢其積威兇勢似亦不能至此此王委員
良民樂輸
之疑也且截至初四五日漕倉止收四五千石而現
犯供已斂得一萬四千串錢亦與米一石錢一千之
數不符可見並非米由公局經由繳錢給票後而始赴

錢較量置銀爲虛位仍聽其自爲消長而潛移默奪可傾其勢於不覺也昨

星使汪衡甫先生亦見示大錢議其議專就京師言擬法行自近也此間吳小穀太守亦有大錢說其中節目小有參差也而兩君大意則皆與尊見相合亦可驗人心之同矣未稔文駕於何日吉旋節署辰惟霜信送寒珍衛自宜定符頌悃手泐肅復

復蔣子瀟孝廉

不見垂二十年蹤跡乖違簷系曷極每閱春榜都無我子瀟之名爲悵疑者屢焉頃從丹木觀察處奉到手書

如一朶吉雲自天而下捧函先喜復承惠示大著數種
竭三日力盥讀卒業得悉足下別後梗概蓋已力敦樸
學專意治經成有說經之書且於九章算學尤能實測
探微苦心孤詣此千秋之盛業也區區詞章一端尙不
足以盡足下况人世之浮名更何足爲我子瀟介意耶
欽遲慰悅輒不禁神馳左右也弟隨境浮沈學殖荒落
殆盡而竊祿苟安謬當重寄究竟於人物毫末無補愧
負而已知愛其何以策之使旋匆匆率復嚴寒伏惟爲
道自珍白金二十兩聊侑空函記愚山先生集中有寄
蘇門孫徵君小東以白鏹十金爲壽僕之視愚山奚啻

倉也然則賊情若何大約伊等之票即算伊等之串各
 都各圖必有首惡數人就地斂錢給票即伊等之圖差
 也其分布甚密其黨與甚多此真黨羽其當場持械納喊者非黨羽也而必
 擡出一公正無私即分賊必勻也之周詳彩以為招牌始可聯
 屬黨羽恐嚇良懦此弟設身處地想出賊情如此似十
 得八九所以必如此想者以各都各圖首惡必須一一
 窮搜捕盡方是了局不然雖拆公局拏當場持械納喊
 之數十百人無益也而各都各圖之首惡此時必不逃
 散知官獲譴而役安從何追究姓名王大登其記事珠
 也必須向其一一窮詰須於密室退人問之洩則無用矣詰出一處即

派人飛往掩捕必可得手至要至要至於打毀水桶宣
播大兵撤後仍行報復之說皆一班無聊之輩失卻每
日二百文大酒肥魚樂處姑爲此崛強自娛耳但使首
惡窮追不鬆勁追得一分則浮言息一分追得十分則
浮言烏有矣如鷹隼厲秋鴟鴞授首其蠅蚋蠹蟲直不
知消歸何所矣而無識無謀之地方官見蚓懼蛇之見
當勿爲所惑也此信吾兄閱後令倉守張令曾令馬令
等各錄一通留緝帶兵之將領亦令閱之俾不迷於所
嚮也

復李石梧制軍

貴溪德興臨川之事均已次第就緒來教謂漕務爲病源而官民交困互怨非循良不克收效此誠察吏安民正本澄源之至論也第漕爲總名事有百端此間情事有非可以意計測者敢將實在情形爲吾兄陳之往常漕務小小唇舌幾於無歲無之弟不獨不肯輕率動兵總先求官與民洽使輿情不致隔閡而三五漕棍自勢孤而易了卽如年來新喻吉水萬安上高皆先期布置擇人使往授以機宜惕以功令幸皆安然就理官與民不惟不至互怨且並不至交困

其話甚長
無服繁稱

而貴溪德興

臨川之事幾若因漕事而紛紛調兵未免駭人聽聞其

實非漕務也其詳細可得言焉德興本係鹽犯拒捕與
漕事絕不相涉不過因黃柏塘地方設有鄉倉額米僅
一千石零向須該縣賠出兌軍費者其時正值開倉適
有拏犯之事花戶畏事不前並非藉端鬧漕乃該縣識
淺才短鵠突具稟經弟嚴批痛斥果批未到而漕已完
其酌撥饒營兵丁捕梟究竟兵到亦無所用之犯已次
第就獲此德興之酌調營兵絕與漕務無關者一也貴
溪年來失之姑息漕棍每年須官允以淮上無費之米
若干石必如願而始安而伊之取於民者視官有加焉
甚至上下忙開徵須官犒給酒席錢方肯投櫃

非通縣
如此矜

棍之都有之數亦不多
不過十千八千之間

實堪駭異上年官稍振作而伊

等卽欲藉考滋事意官將以辦理不善去任繼之者不
得不遷就伊等而不料鬧得太甚至於殺斃二差勢不
容已此貴溪之酌調營兵彈壓拏犯似涉漕務而仍與
漕無涉者一也至臨川之事真有出人意表者向來臨
川之漕有上米而絕不出兌費者有上米而少出兌費
者有全完折色者參差不均是以漕棍得以播弄把持
二十六年周詳彩等設局斂錢包攬上米情勢洶洶其
時有司未嘗不請兵彈壓第知該縣漕務本未妥協屹
不爲動但委員前往查辦特調東鄉張令炳堃往署以

該令辦理東鄉有效民情愛戴故也該令到臨川果能與民相親卽照東鄉章程無論是何戶頭通縣一律米皆平斛響攬顆粒不加每斗貼兌軍費二百文民皆踴躍歡呼謂從來無此便宜各鄉皆勒石遵守弟方謂臨川漕事可從此相安缺雖較瘠公事亦尙不致貽誤不料一班包漕喫飯棍徒因定章如此無從煽惑百姓亦無從挾制官長乃鋌而走險硬派百姓每糧一石給伊等錢一千因太覺無名遂假借建造許真君廟旋蓋廊屋數間卽設公局於內刊刻執照先於四鄉分派黨羽按戶按糧斂錢散給執照倉門首設有几案派人把守

凡花戶上米必呈驗有照方准進倉如無照卽搶米細人至公局弔拷如此情形弟猶以爲此非用兵之事也委員前往查拏拆毀公局而已乃公然拒捕傷兵次日復鳴鑼罷市聚集無賴數百人圍至縣署向官要飯喫聲言逐回委員不准省中再來查拏且直入宅門縣官之母方食飯喝令放下云我們無飯喫你們也不能喫飯差阜畏避不前官無爪牙無如之何遲之又久有人來大呼曰周詳彩老爺分付你們不要傷官回去罷眾乃紛然散去如此情形直是亂民萬難姑息不得已委糧道帶兵前往將其黨羽盡散將其公局拆毀而良民

始得安穩上米不旬日而漕已通完設法拏獲從犯數十人其脅從及雇來不逞之徒原不欲窮追意將首犯拏獲即可稍示懲創歲底首犯周詳彩就獲解省正擬訊結不謂其死黨周景幅等膽挾紳士作線指拏周詳彩之嫌糾眾焚搶贓至巨萬屋至百數十間經官查拏又復鳴鑼脅眾拒捕傷兵並將官兵屯駐之萬年觀放火燒燬仍徧貼匿名帖欲放回周詳彩並省中如有官來將頭丟下等語良民紛欲遷避萬不得已委周守及丁叅將帶重兵前往及大兵一到其首惡及同黨各村莊逃避一空一面曉諭附近各村毋得再被脅從一面

分投偵捕獲得從犯十餘名良民始均安堵周守及丁
叅將現已將大兵撤其多半帶犯旋省仍留百數十名
在彼彈壓緝犯此臨川縣一再調兵似專屬漕事而實
與漕務無干者一也以上各情節公牘中有不能詳盡
者吾兄駐節稍遠恐一時未悉其詳而傳聞異詞第渾
而言之曰鬧漕耳弟在此目擊心營旁加諮訪實在情
形如此官未苛民民不畏官法紀攸關亟思整頓非然
者弟何敢孟浪從事更何敢不問官之待民何如而徒
舍本以求末哉所愧德薄能鮮未能化此梗頑無所逃
責耳至張令既係好官既著有成效何以反令離開

該令撫輯是其所長而摘奸發覆心到身到其所短也
馬令永熾於此等較優其時周詳彩尙未就獲急則治
標以彼易此亦不得已之苦衷也用敢附陳再周詳彩
以一鄉民而能傾動合縣頗令人莫解其故弟訪之久
矣其人粗通文義以訓蒙爲業平日假仁假義好與人
間事美言之則居然王彥方也俚言之則水滸傳之吳
用也向來並未出頭包漕其族約有千數百戶良莠不
齊其莠者則包漕健訟窩賭庇娼無所不有二十六年
周詳彩覷得該縣漕事大有可啖指揮其族之不逞者
分赴四鄉每糧一石斂錢五百文爲訟費號曰爲通縣

振紀綱其時舊章本不安善故從之者眾彼乃以此挾制官官亦不過曉諭開導而已相持久之迨新章既定花戶無不樂從彼亦只好歇手而乃號於眾曰此我之功也吠聲者亦遂曰此周詳彩之功也而所斂之萬數千串錢除飲啖及瓜分外饒有盈餘周詳彩則潤屋華身其婦女插戴有金銀矣二十七年彼知漕務本文無可下手乃幻出建廟斂錢一法其聲名本足悚動四鄉助以族惡之兇悍故富懦者買平安而勉與之錢弱小者畏勢馘而忍與之錢甚有愚柔者信之爲好人而感激與之錢亦有游移觀望者而彼且自謂我自徵比樂

輸於花戶與官無干官不應拏我而不知其按糧科派
給照等事之已蹈於法也而更不覺其拒捕傷兵罷市
閔堂之於法愈蹈愈深也此周詳彩之大略也去此一
害地方庶免後患耳

吳文節公遺集卷六十五目錄

尺牘

復倪廉舫觀察

復劉玉坡制軍

復咸崧圃觀察

復毓星甫觀察

復沈小湖侍郎

吳文節公遺集卷六十五

男養原謹編

尺牘

復倪廉舫觀察

展誦別紙惓惓以洋盜腹盜爲憂具徵公勤在抱不肯
以事非已責漠然置之也此間洋盜窟穴南北漁山之
外間尙有東審一處水師將弁何人得力兄旣未能知
悉且各營雖有節制之名仍須制軍作主嚴厲文檄已
不啻至再至三恐未必有用也然不敢自寬也如夷燬
營船一百數十餘隻延今未辦設營中反脣以稽其何

詞以對兄到此第二次發摺卽

奏請籌辦頃尙未奉

批回儻交部議又難免延宕耳此洋盜之急欲痛辦而急切實未能得手之情形也至腹地陸盜兄八月二十四日接印訪知紹興城內湖州城內八月間均連劫二次湖郡並拒殺鄰佑當將歸安縣叅革副將摘頂責令知府拏犯始得將八月二案全行破獲紹興官較可用故未叅而設法追逼亦將八月二案破獲惟溯查嘉興湖州二府自二十四年起至現在止搶劫重賊之案各不下二百餘起破獲者不過十之一二居者幾不聊生

行者視爲畏途思之不覺心悸汗下然揆其致此之由
在浙實有浙之病緣嘉湖二屬漕事艱難年換一官秋
冬間到任卽趕忙漕事漕事出門又忙道款道款未了
更忙奏銷及六七月奏銷方竣亦屬創聞則各人已喘氣息
肩思卸事脫身矣年復一年何曾有一日問及緝捕耶
官不捕盜非盜之難捕亦非此拏彼竄也鄙意此時欲
求捕盜仍須先求吏治在浙言浙已先將嘉湖二屬知
縣絕其年換一官之錮習募得一二候補縣能耐勞苦
者前往協辦經費藩庫一無所籌姑先捐江西餘廉給
之總責成現任各員將從前逸犯一一破獲嗣後新案

日漸肅清爲效驗不准以盜從鄰省而來勢難越拏爲
詞盜能來官卽當能拏必使之不敢來而後已而劣捕
惡窩之近在目前者尤不容推諉其武營亦必須出力
而更難得力鄙意亦責成副叅大員與之言明不得力
卽專叅大員彼身家較重或自求設法也若徒叅汎弁
無益也此間現辦如斯亦佛家之所謂漸法也其有無
功效固不可知卽應否如斯亦不敢自信故雖已下手
試辦初未敢遽商之立翁也此設法試辦腹盜之情形
也且鄙意謂各辦各家最好各家皆牆宇峻整爪距鋒
鉅則此亦無所竄彼亦無所竄有畛域而無畛域矣所

謂人人親其親長其長而天下平也若大張旗鼓繁定章程廣籌經費委大員專辦未事先經入

告無論事本應辦無須入

告各藩庫不名一錢那有閒款可籌實缺道將各有所司不能委候補中又無人可委漫委之亦不過紛帶佐雜隨員暖輿安舸坐糜地方之供應運氣好獲得一二起逸犯搶稟報功而已恐虛文多而實際少也此兄拙鈍之見自忖才識不能開展况初到此間情形究生吾弟素知我者閱歷亦較勝多多務祈將不是處詳爲指示以便改正期於公事有益兄非護前之人也

步下集卷之十一
復劉玉坡制軍

攻剿漁山盜窟一事弟孟陬三日專函奉商其時尚未
接客臘二十四日手教未知吾兄業已動手業已咨請
寶提軍過浙剿辦嗣二十三日據慶道稟復一切情形
弟以事不宜遲當卽分別咨檄迅發並備公牘暨手箋
奉達冰案弟之所以敢於專委慶道辦理者實因浙洋
盜劫橫行原應聽候吾兄指示遵辦而弟遂藉口省心
取巧卸責撫衷自覺不安是以冒昧施行非敢不顧駭
詫甘蹈鹵莽也頃奉誨示詳明不禁瞿然若失慙然心
折惟

令箭則已發矣咨檄則旣行矣其中委折不得已之苦衷有不敢不爲吾兄瀆陳者緣漁山小醜上年曾一再遠勞盡慮而尙未能埽穴擒渠者非竇軍門之不武亦非各鎮將之不力也實以該山地險足恃口外深而口門窄我師船不能深入亦不可深入其時未及雇勇夾攻是以一則空空而返一則僅將其停泊山外劫去之沙船牽回而已弟擬此番舉動必須師船圍攻其外而以壯勇登山擣巢滅穴方可得手惟壯勇如一屋散錢若無人統帶責成則亦徒糜金錢而已是以擬令莊通辦此而莊通非慶道不能用之壯勇一切旣歸慶道統

理其間與各鎮水師如何訂期密約如何分投起伏必須打通一氣若不稍假以權則營與勇終成搏沙之勢至於調度者非謂其調度提鎮提鎮大臣不獨非慶道所敢調度卽弟親往亦不敢調度也現在各鎮及檄道之文均令其會同商辦其將弁則令該道節制調遣卽與吾兄檄飭該道察將弁之不用命者揭叅並移各鎮知照之意相似也若夫海上船隻一挂篷則不能整隊弟亦久竊聞之布置機宜全在事先弟之欲慶道就近駐劄者正欲其事先商訂非欲其揚帆奪幟指揮咤叱占水師之地分諸將之功也慶道之不能操戈執盾雖

陸戰猶不堪況海上乎弟雖毫無知識亦不致愚騃至此此弟委慶道之本心恐吾兄未能察悉用敢醜縷布聞而該道之曾兩次請

令求試於閣下則弟固未之知也現在所懇禱於吾兄者除善提軍弟本請其在北洋堵捕未請其會勦定海鎮已遵奉指示改赴北洋堵捕而溫黃二鎮仍求吾兄嚴檄飭令會同慶道妥商兵勇如何分布如何合手務期殺賊靖海萬勿稍存意見其將弁均聽慶道糾察慶道處亦求吾兄嚴檄責令會同兩鎮和衷商辦其將弁之不用命者責令糾察揭叅如此則事體不至鬆勁而

弟之藉叨惠庇者曷有涯涘耶總之此事得仰仗吾兄之盡謀碩畫竇軍門之威望壯猷此間直可坐享成功不獨慶道徒事勞勞卽弟之盲思瞽說亦未有一當也但以職任所繫區區之心不敢偷安自諉要不過如燭火助明邪許繼聲而已諸惟吾兄提挈而教誨之感何有極竇軍門處弟前曾畱懇其啟節時飛信示知以便近商一切頃思海上風汎靡常雙鯉恐彼此難達過聞安時務乞代爲道意並致感謝儻到浙後有需餉需勇之處卽文行石浦慶道處商酌取辦可也再弟處止委慶道一人此外文員卽繪圖上稟之象山縣亦未委令

幫辦昨由省委令齎

令齎銀赴石浦之候補縣並飭其交代後卽來省銷差
不准逗遛覬覦此間年來吏習之壞浮夸虛詐弟方深
惡而痛絕之力求挽掇豈無實大言所能騙誘硜硜拙
見差堪告慰垂厯耳

復成菴園觀察

接奉惠函知有職員周道遵暨鄉民等因興修烏龍磳
水道疏通得獲豐收歸功於足下上扁送繳之事足下
卻之不能酌量將繳送至神廟將扁收而不懸斟酌頗
爲得宜而察核來函情詞似與府縣頗有齟齬以此案

周道遵與吳傳鉅等涉訟未結在府縣之意以收受周造之扁繳吳造必藉口徇情偏袒恐案難結在足下之意以堅拒不收則當下卽拂眾情恐事有不妥而以僕衡之則所見均似未甚諦當甯郡近年風氣不好紳董往往藉公事弄錢周造吳造之互訟未必不各挾私心此時周造之必欲送扁繳於足下者非真感戴足下也

此硃確係徐信軒主令興修足下但批勘辦而府縣尙未勘覆其不敢自以爲功鄉民豈不知之

不過

欲藉此一舉做實硃之當修欲打贏官司耳殊不知事但當問其有益無益卽可判其當爲不當爲修硃而獲豐收則硃之當修無疑硃當修則周造之打贏官司無

疑卽不送扁繳無害其爲打贏官司也

當時若將此語向周道遵等破

其扁而發其覆彼必有啞然失笑者至伊等稱與訟事無涉乃遁詞也

至吳傳鉅等一造

當曉以修碑卽獲豐收則碑必當修無論其爲烏龍碑爲林家牖無論久廢不久廢均之當修則均之不准爭阻如吳造再行狡強卽嚴行究懲至原議碑上房屋不動微聞現在有拆毀之處令周造或量爲賠修或量爲償價則案亦允協矣鄙見如斯未知當否此信不妨與羅守共閱將來讞斷時卽照僕前後大意判斷當卽可了須斬卻一切葛藤但以現在實事判斷方易了結再僕謂足下斟酌得宜者更有說焉繳旣送往神廟扁又

始終不挂在吳造不得藉口徇情案不難結如周造必欲求挂扁額則告以碑自當修而修碑非我之功我不敢居功上扁惟汝等遠道送來不便卻而不收耳告以碑自當修一語則自然不拂眾情若告以訟事未結我不便挂扁則是驅之使糾纏求挂扁矣措詞恐不甚得法然否惟高明參之

復毓星甫觀察

此間忽罹奇災輕齎一項雖尙短些須幸而可以敷衍過去若再遲十日則所短數萬均無法可施矣今歲春夏以來雨多天寒春花蠶絲之歉收吾兄所已知也詎

料自閏四月十六至今一月有餘晝夜大雨如注其中
見太陽者不過二三日而此二三日中亦不過半日片
時陽光餘仍陰晦溟濛底水本大加以日添數寸尺餘
之淫潦無處宣洩現在田與江河湖聯成一片田中積
水有至盈丈者省城窪處積水二三尺外州縣無不撐
船入市公廨監獄無不牆圯屋塌而民房之被沖倒浸
倒更不計其數某與同人朝夕步禱靡神不宗痛哭哀
籲迄不能稍回天意頃尙淋漓不止所苦者非三五處
情形然也杭嘉湖紹嚴五府二三十州縣處處同病節
氣已逾小暑二三十州縣數十萬頃之田粒種不能入

土數百萬生靈之命何以爲生縱蠲賑兼施能全活乎
且苦中尤苦者刻下藩庫二十八年奏銷所收不及五
分大半皆上游各屬所解而錢糧最重之嘉湖紹各屬
現在有司拯溺不遑能徵乎能解乎明歲之漕糧顆粒
無運今歲之上下忙大半無徵且姑勿論目前卽不得
過去某當食不能下咽中夜徬徨起坐繞室而行不知
天心何以嚴酷如斯書至此兩聲正緊淚與墨俱矣某
罪愆叢集宜罰及一身此數百萬百姓何辜現某惟求
天速賜一死以稍挽數百萬生靈之命以稍紓
國事足下誼切同舟聞之其何以爲情也

復沈小湖侍郎

某供職無狀罪愆叢集召此奇災致苦吾數百萬之赤子當食不能下咽中夜聞雨聲徬徨起坐繞室而行不知所措自疚自撾雖卽死不足蔽辜接奉訓函譴示周詳無任紉感昨月半後見災象已成卽將實在情形飛章入告現又將酌量應撫情形上

聞承示急須撫卹一月口糧最爲扼要之論惟尋常偏隅猝被重災趕緊撫卹毋庸先查戶口此番之災則三四十州縣一片汪洋若不查清戶口無論爲撫爲賑皆無從下手是以現在已委員馳赴各地會同地方官確

切挨查並遵照道光三年仙舟師舊章令各村各莊公
舉紳耆二三人無紳耆者責成莊首先行逐一開報一
面籌款預備戶口既定即便舉行定一處行一處亦無
所牽制也第現在節過大暑粒種不能入土距明春將
近一年縱有銀錢何以延數百萬生靈之命故此時廣
購米石補種雜糧二事尤爲至要至要各關米船免稅
業已

奏明並飛咨各省矣而福建之臺米廣東之洋米暨山
東二麥雜糧均飛咨各省督撫無論官商設法采購由
海運來浙源源接濟浙西向多不種雜糧而此時節候

已遲秧不能補土豈可曠已檄飭印委各員多方曉諭
百姓就種之易購易出而可以療飢者盡力補救並告
以雜糧縱獲豐收斷不因此不放賑斷不因此又徵錢
糧以祛其惑而鼓其力至目前撫卹之舉若全靠官帑
則災區太廣就藩運兩庫現存之數雖罄藏不足以濟
不得不借資紳富協辦勸分卽所以保富現在杭紹兩
府已全由捐辦敢求吾師提倡一呼則眾情踴躍張守
處已專札飭辦應如何多端集腋不必拘定一格各就
各地情形籌辦萬一不敷再由藩庫籌給應用並乞吾
師卽晤商張守指示辦理無任感禱至此番災情之重

災地之寬數倍於三年而此番辦災之難數十倍於三年皆吾師之所洞鑒也不敢贅述某辜

恩溺職戰懼悚惶凡力之所當爲所能爲者尙何敢不
勉奮而痛哭顙天挽回無術不知吾師更何以教而拯
之

吳文節公遺集卷六十六目錄

尺牘

致孔誠甫廉訪

復喬見齋中丞

復孔誠甫廉訪

復呂堯仙方伯

復勞辛階方伯

復呂堯仙方伯

吳文節公遺集卷六十六

男養原謹編

尺牘

以孔誠甫廉訪

黔省盜風之熾已匪伊朝夕地方官正署迭更各人習
中祇知有調劑二字以致傳舍其官膜視其民訟不能
聽而徒責民之才健盜不思捕而藉口於缺苦捕費解
費無出因循泄玩膽大者倡爲諱匿不報之術庸冗者
尤而效之靡然成風實可寒心卽如前日思州府麻音
塘之案直是流寇焚掠行徑豈復能以搶劫論閱之駭

目動心僕已限文武半箇月獲犯另備公牘奉達想已
閱悉中丞自亦嚴切督責未諗如何辦法此案如屆限
不被獲或僅獲零星數犯必須嚴嚴叅官儻竟能獲犯
無論人數多寡有一百梟示一百有二百梟示二百刑
亂用重不易之則也切不可任聽陋幕庸官拘文牽義
猶以入室瞭望被脅強分等級致此案尙有活罪也活
人卽損一分陰陽要緊要緊弭盜爲吾兄專責頃復奉
當如此翻轉看嚴旨切責務望吾兄督率各屬振刷精神洗心滌慮勿
循舊轍務收新效僕已有通飭文武之檄另達冰案非
空言吶喝也白簡已展放案頭矣僕耳目較遠諸祈吾

兄就近鞭辟察核隨時示悉爲荷至黔省瘠缺之多搶劫之盛捕費解費誠有爲難者僕豈強說官話不近人情哉第因噎廢食知有官而不知有民是使官爲盜之護符矣盜風焉得不熾民生焉得不困是亦當有道以處之也其捕費則身膺民社不准吝惜雖稱貸典質必須措辦果能下手振作半年後必可不花多錢果能在任二三年盜輯民安卽以遵義畢節等缺酬之亦足可補苴也

此等缺專俟此等人攬一情面之調委不得其解費不得撓一無勞績而妄得善地者不得

則省中院司胥阜之例規應裁者當極力爲之裁之不

然或近解道署核審明確情重者請中丞發

令就地正法再不然准其斃之杖下以格斃煩斃報另
單呈明亦無不可
此中亦大有流弊妄殺無辜藉此案
銷彼案甚至虛無縹緲並無其事而
託言以了案種種須防亦視其官之爲人何如耳
平時之考驗卽事之察訪廉訪均得操其權也但有
案必須速報已報必須卽破斷不可苟安粉飾下以不
報案謂可免花錢上亦以無報案遂信爲無事養癰貽
患可不戒哉

復喬見齋中丞

宮傳尊兄於戢盜一事亦可謂舌敝唇焦不遺餘力而
有司均奉行不力若此時更不嚴嚴叅官恐仍難期振
動弟豈不知萬里宦游一朝梗泛有人情所難堪者然

一家哭何如一路哭古人不我欺也妄進瞽說幸高明
留意焉

復孔誠甫廉訪

黔省盜風之難靖由於民貧官貧僕知之稔矣然民不
能憐其貧而遂可任其爲盜况迫於飢寒者十之二三
根於情汰者十之七八官更不能諒其貧而遂可聽其
縱盜僕前言所謂捕費不容客解費當與豁之亦正患
其貧而又患其廢事也况假以便宜之易於得手更難
藉口耶因噎廢食養癰貽患殊虞虞耳黔中搶劫之風
固當急治卽磕詐之風尤當急懲新例鎖繫鐵桿此中

丞繁費苦心卽患其貧而又患其廢事之意並以若輩徒而不役徒而卽逃法爲之窮藉拘係以消其桀悍之氣或可化莠爲良近日各屬報大小五報恐嚇取財者殆無虛日官不累而法易施其中困辱改悔限滿而爲良者必多裨益於地方者豈淺尠哉特恐愈積愈多其間凜法者翩如食甚而稔惡者甘反嗜荼僕竇人也切年託迹民間親見繫鐵桿帶長枷者凡城廂村鎮肉牀魚攤油鋪米壓下及菜傭薪販有日規有月費有朔望禮三五成羣各有地段市人奉之惟謹雖黔地荒涼不至有如此之事然總須地方官實實有疾惡如讎之心

不徒循鋤暴安良之迹若輩無死法而有死理置之不
死不活之間

或斷其脛或剪其筋或抉其目

婆心辣手使闔邑聞而知

懼一邑如斯通省皆然庶有豸乎卽如思南趙老五一
案該府不獨係照例仿辦正是腳踏實地免致擬軍脫
逃官受累而犯轉無苦也僕無刑名專責而饒舌添足
自知大謬不然然生平不解違心區區之心此等兇徒
儘管按例牌詳辦而酌量廢其五官四肢一體以篤疾
報免解官不累而犯眞苦法亦盡庶使聞之者稍知悚
戢也惜乎官無實實疾惡之心念不及此耳至謝人龍
之案自應更正辦理山西竇雞小子其前車也凡命案

必須詳慎不妨罪疑惟輕與搶劫磕詐之案須用兩樣手筆也吾兄以爲何如

復呂堯仙方伯

黔省諸務原係中丞主政第盜賊一門弟與有責任已積玩若此若再隨聲附和做好好先生不獨無以對

君父設將來釀成大患能置身於無過耶弟默揣黔省各人意中目弟爲怪物指弟爲鬧脾氣者當不乏人然不敢卹也向來黔中大小官員動輒皆云近時盜風已斂大吏認真有司得力試觀於某案會

奏明破若干起某案會

奏明獲若干犯亦可謂不遺餘力可告無過矣其實皆違心之談自欺以欺人耳僕生平不敢出此鄭夢翁三十年夏間尙

奏稱如何講求緝捕前後共獲犯幾百幾十名盜蹤已遠云云乃未三月而火已燎原矣可不懼哉僕有一鄙喻焉譬如同室有病者誼不容不顧而心實痛癢不關未嘗不醫士盈門藥方堆案究竟病者之患苦何在不問也醫士之庸良不計也藥方中之舛謬訛誤不暇致詳也依樣壺盧一付之悠悠之手但期有醫者轍迹可以飾人之耳目有藥方存積可以抵人之責備而病之

能療與否漠然不一動心也可乎不可乎僕豈敢謂能療病哉特視同室如疾痛之在身則不得不思有以祛之欲祛病不得不察方欲察方不得不擇醫其力除庸誤不顧駭人曲體醫情竟以假手亦惟期病之能療耳但一手挽之十手推之庸有濟乎弟與吾兄神交者久矣素欽公忠體國實事求是一切得合志同方其所以裨益僕者多多矣

致勞辛階方伯

頃接據各屬探報知西隆西林一帶有粵西土匪勾結滇省之抄人獵人在彼肆行焚搶蹂躪村寨乍起乍滅

等情查抄人獵人皆係滇省沿邊普峒居住之人自應
滇中堵其出截其歸方是正辦而無如勢有所難何也
緣沿邊四五州縣幾及千里轄地皆若輩巢穴其中種
類各分良莠不一丁口不下數十萬旣不能草薶禽獮
卽不能埽穴擒渠所謂責成頭人稽查約束亦餽羊而
已頭人中卽難保無嗜殺好盜之人也而各普中羊腸
小路防不勝防者不能數計若輩又三三五五晝伏夜
行無從蹤跡其出也如此歸也亦然今夏聞有抄人在
粵滋事卽嚴飭文武查拏亦陸續獲得數十犯無如未
經大創其潛蹤詭迹而出入者如故也然則將如何而

可勢非痛殺不可若輩所畏者亦惟有殺之一字第欲
就其巢穴處殺之勢苦散而無從下手必須於其滋事
處殺之轉可聚而殲旃已出者殺盡不得歸未出者自
聞風不敢出再於各壘峒挨寨訪查名捕冥揆以制其
蠢動且勾引之奸民實係首惡渠魁能殲除其魁首若
輩無所依附必不敢貿然出巢現在粵中地方官焦頭
爛額艱苦萬分賊朝散則保朝賊夕散則保夕亦無可
如何也據此間羅平州稟稱詢據西隆州苗稱前有鈔
獵土匪在境滋擾帶兵練攻勦獲犯六名正法餘俱逃
散云云尙以攻殺爲主據此間寶甯縣稟稱因聞鈔獵

土匪在西林縣燒搶村寨不休距寶甯縣非遙函商該縣彼此會剿而西林縣則覆稱某寨事出有因某寨彼此誤傷寨老現已代懇投誠云云似以將就了事爲主弟擬懇吾兄作爲訪聞嚴飭該州縣設法密捕勾結之奸首期在必獲爲第一要義如遇有抄猥匪徒在境滋擾務卽會營率帶兵練痛剿一面飛移滇省相近各州縣協力圍攻兜捕弟亦預檄沿邊各文武一經粵西知會或探有風聲卽率帶現在防堵之兵練飛速協攻圍捕總不使抄猥匪徒有一人生還弟頃復另行遴委勇幹文武改裝易服於各曹寨悄密偵防購捕將曾經

出外滋事及著名兇匪陸續探獲獲一名殺丁名以示懲創如此兩省合辦居行並懲庶可期若輩之帖耳跽伏也再若輩現在每以某某報讎爲名其實乃倖粵中股匪未滅大兵斷不能兼顧因而乘機糾衆以殺人劫財爲生涯俟去俟來成爲故事不設法殄之恐愈釀愈盛兩省均受害也鄙見如斯未知當否敢質之高明伏祈酌核示覆無任翹禱

復呂堯仙方伯

黔中漢苗錯處盜風之不靖未始不由於吏治之太疲其始或由於瘠苦爲難其繼遂流爲粉飾太平遇案皆

思消化獲犯從不實辦其中之藉盜銷案舍承緝而緝他盜以討好邀功又歧中有歧也皆有害於事者也自足下抵黔後人心似稍覺振動前此弟之千言萬語有目笑腹誹而已有怨詛而已人之多言伊可畏也然欲弭人言亦惟自返而已鄙意此時黔中光景不難於釋聖懷而難於挽吏習不難於清盜源而難於破官邪去賊易去朋黨難以小喻大將毋同前函所云實缺不輕易調動此一言破的也必須從此處下手全賴吾兄堅定不搖卽將來蔣四先生到後主持仍在足下也